



MINISTRY OF EDUCATION AND TRAINING

La 11 Pherekhong 2019

POLELO EA 'MUSO KA LETONA LE KHABANE LA THUTO LE KOETLISO MABAPI LE HO BULOA HOA LIKOLO

Sechaba sa heso, mona ke netefatsa phatlallatso ea hore likolo tsohle tsa thuto ea mathamo li tla buloa ka la 14 Pherekhong 2019; ha tsa thuto e mahareng tsona li tla buloa ka la 21 Pherekhong 2019. 'Me litichere tsohle tse hiriloeng ke Teaching Service Commission le tse hiriloeng ke liboto tsa likolo li lokela ho itokisetsa ho qala tšebetso ea bona ea ho ruta ka matsatsi ao ke seng ke a lokolisitse. Bohle re sa tsoa bona lipheto tsa sehlopha sa Leshome tsa selemo sa 2018, 'me ke lumela hore letšoenyehile joalo ka 'na ka tšebetso ea bana ea 2018. Ho qala tšebetso ka mafolo-folo, ka nako e lebelletsoeng, ho etsa barutoana ba sehlahlo, ba thahasellang mosebetsi oa bona oa sekolo hape bao maikutlo a bona e bang a tsitsitseng. Matsatsing ana re bona litila-tile tsa batsoali le baholisi ba bana libankeng ele ha ba lefa school fees le tse ling ho lokisetsa ha likolo li buloa. 'Muso le ona ha oa itheka moroalo hobane thepa e sebelisoang ke litichere le barutoana (*stationery*) e ntse e finyella likolong.

Leha ho le joalo, Lekala le fumane menyenyeletsi e bontšang li khothalletso ho litichere ho ngala mosebetsi ho tloha ha likolo li buloa. Ke ipiletsa ho litichere ho se ikamahanye le melaetsa ena e ba hlohlolletsang ho tloha molao. Ke rata ho hopotsa litichere hore Lekhotla la Boipiletso la Bosebetsi (*Labour Appeal Court*) le fane ka kahlolo e etsollang qeto e neng e fanoe ke Lekhotla la Bosebetsi (*Labour Court*). Hona ho totobatsa hore seteraeke se ntseng se lohothoa ha se molaong ho hang. Ntle le mona, litichere tse tla ngala mosebetsi ho latela tlhohloletso ena, li ele hloko hore ba tloha lipehelo tsa *Teaching Service Codes of Good Practice 2011*, tse supang, hara tse ling, hore tichere o lokela ho ba mosebetsing ka linako tsohle tsa molao. 'Muso, ka Lekala la Thuto le Koetliso, o khatile tema e bonahalang ho arabela lillo tsa litichere, 'me o ntse o tsoela pele ho sebetsana le tse salletseng morao. Ka hona, hoa makatsa hore ebe hona le litlhohloletso tsa hore ho tloloe melao ea naha ena. Ke se ke ena le maikutlo joale a hore mohlomong litichere li

tseka ho hong, e seng tsena tseo re ntseng re sebetsana le tsona. Hara tse ling, 'Musu ho tloha ka 'Mesa 2018 o se o lefile likoloto tsa litichere tsa nako e telele ka chelete e fetang M38 million ho fihlela ha joale. Khothalletso ea sehlomathiso sa molao ho hira baokameli ba likolo ka *permanent and pensionable terms* se tla tekoa Paramenteng hang ha e buloa.

'Musu o leboha litichere tsohle tse sa kang tsa ikamahanya le likhothalletso tsa literaeke tse seng molaong le ho mema bohle litichere tse mosebetsing, tse ntseng li hiroa le tse tlang ho hiroa ho se ikamahanye le literaeke tsena tse seng molaong.

Ke qetella ka ho tiisetsa litichere le sechaba ka kakaretso hore 'Musu o tla etsa sohle se matleng a ona ho tširelletsa bohle ba tla ikamahanya le khoeletso ena ea ho bona hore mosebetsi oa ho ruta bana o tsoela pele ho tloha bekeng e tlang.

Kea leboha.

Khotso!Pula!Nala!